

四庫全書

史部

欽定四庫全書

史部

欽定八旗通志卷一百六十

欽定四庫全書

欽定八旗通志卷一百六十

人物志四十

大臣傳二十六

滿洲正白旗五 珠滿 瑪哈達
哲勒肯 烏達禪 徐元夢

法刺 佛倫 荆山 開音布 常薰

珠滿

珠滿滿洲正白旗人姓瓜勒佳先世居烏拉祖多和倫國初來歸從征廣寧錦州有功授雲騎尉次子額赫

瑪瑚以三等侍衛隨安南將軍宗室洛託征海賊
鄭成功進攻廈門力戰陣亡

聖祖仁皇帝康熙二年正月卹贈雲騎尉無子珠滿其兄
子也襲其職十三年署叅領隨大軍征江西時逆
藩耿精忠叛應吳三桂遣賊黨犯南康珠滿隨鎮
南將軍尼雅翰等擊敗之又敗偽總兵莊姓朱姓
等於沔津十五年隨大軍規復吉安破賊衆於惶
恐灘十六年三月隨鎮南將軍莽依圖征廣東入

韶州吳逆遣偽將軍馬寶等渡河來犯大軍分隊
拒之珠滿由右翼奮戰連破賊營馬寶等突圍宵
遁十八年六月隨莽依圖進勦廣西由橫州至南
寧擊賊將吳世琮於新村西山大破之遂解南寧
之圍十九年六月隨莽依圖討叛賊馬承蔭於柳
州路經陶登敗其黨范齊韓詹仰等援兵是冬隨
征南大將軍賚塔征雲南二十年正月擊賊將何
繼祖王宏勳等於石門坎奪其隘口賊退據黃草

壩二月克之遂進圍雲南城陣斬偽將軍胡國柄
等七月復隨都統希佛等追擊賊將馬寶巴養元
於烏木山賊潰遁乞降是年雲南平凱旋二十五
年七月叙功晉騎都尉兼一雲騎尉二十七年六
月授三等待衛二十九年三月授護軍叅領三十
年正月兼管火器營事六月調前鋒叅領三十六
年六月擢荊州副都統三十九年十二月奉

命同副都統阿際禮率荊州兵二千會勦四川逆蠻比至

都統滿丕提督唐希順等已復打箭爐遂駐師鴉
隴江防守四十一年六月撤兵還荊州九月鎮草
紅苗作亂

上命尚書錫勒達副都統圖斯海徐九如統師撫勦

諭以珠滿久於用兵凡事與商酌而行十二月撫降三百

一寨惟天星等寨仍負固錫勒達與提督俞益謨
等分四路進勦珠滿領兵協應攻克葫蘆寨斬戮
無算餘寨悉平叙功加一級四十五年二月擢江

寧將軍四十六年三月

上南巡至江寧

賜紫貂冠服及良馬是年卒於官

賜祭葬如例明年吏部請以其子徹木貝襲騎都尉蕪一

雲騎尉得

旨珠滿人才壯健行間勞績茂着衆所共知簡用將軍正切委任未久奄逝深可憫惜所有世職着再加一雲騎尉授三等輕車都尉與伊子徹木貝承襲

瑪哈達

瑪哈達滿洲正白旗人姓佟佳禮部承政巴都哩之孫也康熙七年由叅領擢正白旗滿洲副都統十二年冬吳三桂反

上以兗州地當衝要

命瑪哈達率兵駐防以備調遣十三年正月

詔率所部兵及右翼察哈爾兵移駐安慶三月耿精忠叛

詔瑪哈達移師杭州四月

命叅贊平南將軍賚塔軍務七月精忠偽都督閔標等率賊萬餘自温州處州犯金華瑪哈達率兵馳援同副都統雅塔哩等擊卻之遊奉

命駐守金華九月偽都督陳重等犯金華瑪哈達同副都統石調聲等禦擊於山口村追逐至鄭店三戰皆捷斬賊四千餘俘獲甚衆十月偽都督葉鍾陳逞偽總兵周彪尹福等分犯浦江蘭谿義烏等縣瑪哈達俱遣兵擊敗之十一月偽都督徐尚朝率賊

五萬犯金華距城十二里結寨瑪哈達與台吉察
琿都統巴雅爾總兵李榮等分隊夾擊陣斬偽遊
擊吳榮先等及賊兵萬餘時偽總兵張元兆率賊
二萬據壽溪瑪哈達與巴雅爾李榮移兵進勦破
賊營十有八斬元兆及賊兵三千餘十二月徐尚朝
偕偽總兵馮公輔據積道山瑪哈達與總兵陳世
凱等乘霧進勦破其木柵賊皆潰竄招撫偽官百
餘暨脅從之衆數千十四年正月督兵擊敗偽總

兵沙有祥等於桃花嶺復處州府城三月偽總兵
連登雲偕徐尚朝沙有祥自溫州窺處州距城五
里列寨瑪哈達與察琿李榮陳世凱分兵往勦賊
敗潰復奮兵追擊斬偽叅將陳亮郭美才等獲旗
幟軍械無算十五年八月擢杭州將軍是月康親
王傑書統師進征福建瑪哈達與將軍賚塔由衢
州率兵先驅敗偽將軍馬九玉等於大溪灘復江
山縣遂趨仙霞關偽守將金應虎率衆降大軍進

復建寧延平耿精忠歸順瑪哈達還駐杭州叙功
予三等輕車都尉世職二十三年

召還京授正白旗滿洲都統二十六年以咨補旗員狗
情滋弊罷任革世職遣往黑龍江効力贖罪二十
八年九月卒

哲勒肯

哲勒肯滿洲正白旗人姓鄂濟初任內閣中書累
遷至侍讀學士

聖祖仁皇帝康熙八年擢國史院學士九年改中和殿學士十年京口將軍李顯貴與鎮江知府劉元輔以扣剋軍餉為旗兵揭告哲勒肯奉

命同侍郎覺羅勒德洪往江南察審尋奏言李顯貴等侵盜帑銀贓至六萬總督麻勒吉失察於前復不能劾奏於後請解任質審得

旨允行於是顯貴元輔並坐斬麻勒吉訊非有心狗庇坐鑄級留任是年重修

太祖

太宗聖訓哲勒肯充副總裁官又充

經筵講官遷刑部侍郎十二年三月調禮部八月逆藩吳三桂奏請移藩錦州

上命哲勒肯同學士傅達哩赴雲南經理其事

賜佩刀一良馬二哲勒肯至雲南三桂期以十一月啓行而陰與藩下都統吳應騏等謀亂遂發兵反哲勒肯與傅達哩皆被留十三年三桂復遣其護衛以

自述功績疏付哲勒肯等齎奏還京明年哲勒肯
調任吏部十六年河道總督王光裕以河工廢弛
為侍郎冀如錫所劾哲勒肯與副都御史金傷奉
命往訊得寶光裕罷任先是麻勒吉與漕運總督素幹顏
保先後陳奏海州雲臺山屏障海口為淮黃尾閭
自廢為外洋壅沙日積致運道無所宣洩請復改
為內地至是

勅哲勒肯便道勘閱因奏言雲臺東距大洋西北毗連山

東江南內地雖去運道較遠第向設徐瀆鹽場及邳莊一十八所田畝膏腴棄之可惜請招徠竈戶人民使復舊業其東海營原設守備等官亦應復設下部議如所請十九年遷左都御史

命赴武昌察審雲貴逃兵奏言湖廣標兵隨征岳州辰州用命殺賊迨進征雲南改隸滇標提督桑額不恤士卒致逃兵一千餘人復隱匿不報請

勅部嚴議

上曰領兵官平時不能愛養軍士使軍士無以資生始有
鼓譟逃散之事桑額其即議罪并傳諭各省統領將帥
無得恣虐兵卒貽誤軍機尋議桑額降級留任二十年
遷兵部尚書明年七月

上以兵部議行間情罪多姑息輕縱由哲勒肯瞻狗

訓責之時三逆平定兵部議裁各省增設官兵靖逆將軍
張勇奏甘肅寧夏西寧三鎮請以增設兵五千改
為經制

詔哲勒肯赴陝西會同將軍督撫核議尋議西寧總兵所屬河州及寧夏中衛官兵雖自用兵時增設但地係邊疆請仍留駐守餘悉裁汰九月以病卒於西

寧

賜祭葬如例四十六年十月

上與大學士馬齊衡論在廷諸學士為不及昔年因

追憶哲勒肯為學士時批本最速且以其草書敏捷咸稱

飛手為

褒美云

烏達禪

烏達禪滿洲正白旗人姓那木都魯父喀爾圖

世祖章皇帝時任工部副理事官以監修

奉先殿工成予雲騎尉世職

聖祖仁皇帝御極游擢詹事副都御史倉場侍郎左都御

史刑部尚書康熙二十三年致仕二十五年四月

卒

賜祭奠如例以孫瑚里襲職烏達禪初任驍騎校於康熙
十年授三等侍衛洵擢一等兼佐領二十七年喀
爾喀土謝圖汗及哲卜尊丹巴胡土克圖率衆來
降

上既賜以牲畜糗糧明年春土謝圖汗等以食不繼為請
命烏達禪同學士錫喇等馳發張家口倉米駝載兩月糧
往徧給之二十九年六月喀爾喀部人殺牧長掠
馬逃牧廠大臣瑪希追捕弗獲烏達禪奉

命飭土謝圖汗執獻逃犯十餘人斬其首惡以馬還三十

年五月

上幸邊外安輯喀爾喀歸附人衆先期

命烏達禪同內大臣索額圖傳

諭土謝圖汗哲卜尊丹巴胡土克圖詰其同部自戕及諸

妄為事咸具疏自請罪

上駐蹕多倫諾爾

召集喀爾喀兩翼諸部長

諭宥其罪尋擢烏達禪正白旗滿洲副都統三十五年二

月

上親征噶爾丹

命烏達禪率兵隨

御營出中路既至克魯倫河噶爾丹竄遁西路為大將軍

費揚古擊敗五月扈

駕班師時噶爾丹屬人丹巴哈什哈等先後來降以時值

炎暑暫居張家口外八月

上命烏達禪乘驛往遷之來京編隸八旗佐領九月

上復巡邊經畫軍務烏達禪扈

駕駐歸化城

頒賚出征凱旋右衛兵

命同索額圖宣

諭獎慰三十六年噶爾丹屬人額林沁哈什哈等來降

上命烏達禪同學士喇錫詳詢之得噶爾丹與其台吉丹

濟拉猜忌離散狀以

聞三十七年三月

命同尚書馬齊侍郎滿丕往視喀爾喀諸部會盟宣

諭禁令七月

上詣盛京

詔馬齊等即由會盟處還京

特召烏達禪馳赴

行在三十八年正月奉

命招降巴爾瑚三千餘人安駐察哈爾遊收地編隸佐領

九月巴爾瑚佐領額克圖等自察哈爾殺牧廠副使阿必達及驍騎校班第等掠馬駝携其孥以遁烏達禪率兵馳追時喀爾喀公錫卜推哈坦等已奉

詔領蒙古兵圍之烏達禪至斬一百三十八人收其孥四百餘還三十九年授前鋒統領四十年陝西歲歉詔烏達禪往賑之尋列議政大臣明年遷鑲黃旗蒙古都統四十四年十月調正藍旗滿洲都統尋以有

疾

遣太醫診視四十八年乞休

詔以原品致仕五十一年十月卒年六十有六

賜銀千兩

命貝勒允禔公富善等奠茶酒

諭曰烏達禪隨朕收服喀爾喀厄魯特巴爾瑚等俱在事

効力有功及簡任都統以來忠誠任事勤勉盡職偶以
患病乞休朕不時存問方期頤養以享遐齡忽聞溘逝

深為軫惻下所司議卹

賜祭葬如典禮謚襄敏

徐元夢

徐元夢滿洲正白旗人姓舒穆祿康熙十二年進士由庶吉士散館改戶部主事二十二年遷中允充

日講起居注官尋遷侍講二十六年四月同尚書陳廷敬湯斌侍郎徐乾學少詹事耿介侍講學士高

士奇德格勒等

召試乾清宮

聖祖仁皇帝諭曰人之學問有一定分量真偽易明如德格勒每評論時人學問朕心不以為然故召爾等面試也是年十二月翰林院掌院學士庫呼訥奏劾德格勒私抹記注事並言徐元夢素與德格勒互相標榜因草職逮訊得

旨寬釋籍入內務府三十三年

命入上書房課

皇子讀書尋授內務府會計司員外郎四十一年充順

天鄉試副考官五十年三月

諭大學士等曰內閣繙譯通本事甚緊要如一二語不符漢文則於事之輕重大有關係內閣侍讀學士及侍讀俱按俸補授之人恐所繙本章不甚妥當在內廷行走之徐元夢現今學繙譯者無能過之可授為額外侍讀學士五十一年同左都御史趙申喬為會試考官五十

二年擢內閣學士兼禮部侍郎免隸內務府歸原
旗五十三年十月充

經筵講官十二月授浙江巡撫

諭之曰浙江有滿洲兵爾當與將軍協同訓練錢糧或有
虧空爾宜清理無累百姓至於用人宜隨材器使不可
求全

賜

御製詩文集及鞍馬以行明年三月疏言上年杭州紹興

台州金華衢州嚴州處州七府旱澇成災田畝邀
恩分別蠲賑並截留漕米二十萬石以九萬石發各縣平
糶貧民得資糊口而應完額賦尚有十三萬餘兩
目下青黃不接輸納維艱請俟秋成後先徵一半
來歲徵完以紓民力得

旨允行十月疏言杭州萬松嶺自明代建立書院

本朝康熙十年巡撫范承謨興修後年久荒廢臣鳩
工整理漸有規模因擇觀風考取諸生及學臣歲

科兩試前列者肄業其中捐資給以膏火無不踴躍樂從第書院未有嘉名請

御書扁額俾諸生出入瞻仰動其欽崇鼓舞之志並

賜日講解義古文淵鑒諸書

御書諸法帖以廣文教

上恣允所請

賜浙水敷文扁額因復奏以敷文二字為書院名五十六

年正月左都御史及翰林院掌院學士缺員吏部

兩疏入奏

上曰是當以不畏人學問優者兼任之遂
特命徐元夢為左都御史兼掌院學士充

日講起居注官

經筵講官並教習庶吉士五月

諭以科場中鑽營積習未除主考同考官有聲名不好者
宜糾劾之俾知警戒於是劾罷編修儲在文張起麟徐
用錫沈宗敬宮鴻厯叢澍等又劾罷聲名平常之

任滿學政王雲錦林之濬車鼎晉萬經鄭晃魚鸞
翔等五十七年五月遷工部尚書仍兼翰林院掌
院學士教習庶吉士六年十月

上曰徐元夢乃同學舊翰林康熙十六年以前進士止此
一人矣因

賜以詩有常懷舊學窮經史更想餘閒力簡編之句

世宗憲皇帝雍正元年正月

命入上書房課

皇子讀書二月同大學士張鵬翮尚書田從典左都御史朱軾侍郎張伯行李紱掌院學士阿克敦勵廷儀奉

詔甄別翰詹各官不安本分有玷官箴者勒令解退回籍
五月因大學士富寧安留辦西路軍營事

特命署理內閣大學士兼署左都御史充明史總裁官十月
調戶部尚書辦大學士事

賜

御製詩有報國訐謨切銜思翊贊勞之句二年充繙譯鄉
試正考官四年八月以繙譯本章錯悞吏部議革
去署大學士戶部尚書請交刑部得

旨徐元夢在內廷行走多年從寬免其交部着革職在內
閣學士之列辦理票簽本章一切繙譯事務効力行走
八年以前任浙江巡撫失察呂留良逆書應革任
命同繙譯中書行走十三年二月充繙譯鄉試副考官是
年八月

今上御極

命南書房行走尋

諭曰徐元夢年逾八旬効力甚久茲當

皇考龍馭上賓緒譯祭文甚屬敬慎着即補授內閣學士
十月授刑部右侍郎自以年老衰邁不能辦理刑

名事件疏辭得

旨調禮部右侍郎會督纂修

世宗憲皇帝實錄充副總裁官又

詔編輯八旗滿洲氏族通譜同大學士鄂爾泰尚書福敏
董其事十二月轉左侍郎

命入上書房課

皇子讀書乾隆元年二月同尚書徐本福敏侍郎姚
三辰奉

命閱取會試迴避卷五月同尚書楊名時教習庶吉士
奏言滿洲庶吉士宜熟習繙譯

上命是科滿洲庶吉士來年以清書散館七月充三禮

義疏副總裁官八月以年老乞休

上曰徐元夢耆碩舊臣今以年逾八旬精力衰邁請解
侍郎之任朕念其情辭懇切允從其請特加尚書職
銜照現任食俸仍在史館內廷等處行走九月

上親撰

世宗憲皇帝聖德神功碑文

特敕繙譯二年二月疏言恭遇

皇上隆禮先師

特命國學文廟易蓋黃瓦

肇舉臨雍大典於廟學配享之制宜予釐定四科十哲之目雖始自論語後既以顏子特配先師因升子張於殿以補其數

聖祖仁皇帝復以朱子昌明聖教有益斯文

命禮臣升躋神位於十哲之次是殿享不盡沿舊制也如有子之言行氣象與聖人相似最為游夏諸賢所推尊允宜升堂配享至宰我冉求一因短喪有不

仁之責一因聚斂有非徒之斥向來論者謂宜移
祀兩廡其舊在兩廡之南宮適定不齊俱以君子
見稱於孔子亦宜並予升配用明

聖朝崇尚德行也疏下大學士九卿議以有子升祀于
夏之下移祀朱子於子張之下國子監及直省府
州縣學均遵行九月復乞休

上曰徐元夢老成望重雖年逾八旬未甚衰憊可照舊
供職量力行走不必引退其繕譯日講春秋等書暨

一切碑文祭文並姓氏館咸安宮事務另派員代管
以便頤養四年正月二日

召同諸王大臣賦柏梁體詩以扶鳩

朝序歲月延賡分韻五月

諭獎抒誠宣力諸大臣加太子少保六年九月遘疾

遣太醫診視

賜復藥十一月疾劇

上諭大學士等曰尚書徐元夢人品端方學問優裕踐

履篤實言行相符歷事

三朝出入禁近小心謹慎數十年如一日謂之完人洵可
無愧且壽踰大耋亦廷臣中之所罕見者前因年老
乞休特加尚書銜復加太子少保照現任食俸俾得優
游頤養以享遐齡今冬在家患病即命太醫調治並
賜復藥近聞病勢日漸沉重朕本欲親行者視因舉
行

慶典在即不便前往着皇長子永璜往視其疾冀其痊可

倘至不起着賞銀二千兩辦理後事令和親王皇長子往奠茶酒再加贈太傅准入京師賢良祠以示朕優禮耆舊格外加恩之至意翼日卒年八十有七遺疏入

諭部議卹

賜祭葬如典禮謚文定

法喇

法喇滿洲正白旗人姓那木都魯父敦泰順治十

七年隨安南將軍達素征海賊鄭成功於福建為
前鋒沒於陣母喜塔臘氏守節撫孤得

旌表法喇初由官學生任筆帖式

聖祖仁皇帝康熙十三年充護軍隨征逆藩吳三桂自湖
廣至雲南得功牌二還京授護軍校三十五年署
驍騎叅領隨征噶爾丹尋授護軍叅領五十三年
遷正白旗蒙古副都統五十五年調正藍旗滿洲
副都統明年十月擢鑲白旗蒙古都統時準噶爾

策旺喇布坦遣其族兄策凌敦多卜等擾西藏
與拉藏汗構兵四川提督康泰率標兵千餘往松
潘鎮備征勦至黃勝關標兵諜回成都

上命法喇往成都會同巡撫年羹堯經理軍務即察訊其
事覆奏康泰素不撫卹標兵偏信守備汪文藻任
其扣剋給兵銀米請斬汪文藻及倡諜兵五人以
狗遣解隨諜九人編揀陝西餘兵仍留營効力

詔如議行
草康泰職五十七年正月法喇疏言打箭爐道

狹糧運維艱自荊州調至成都之滿洲兵一千馬
匹疲瘦請俟牧養稍肥先遣五百兵往駐得

旨俞允會策凌敦多卜戕拉藏汗侵據其地拘達賴喇嘛

于扎克布哩廟法喇疏言打箭爐之外曰裏塘又
其外曰巴塘舊為拉藏汗所轄近聞策凌敦多卜
誘裏塘喇嘛營官往歸恐竟被搖惑已令員外郎
巴特瑪等往宣

聖主威德並令護軍統領溫普于打箭爐選滿洲兵一百

以前鋒叅領伍林葩領之選綠旗馬兵一百烏鎗
兵三百以化林協副將趙宏基領之同往裏塘彈
壓相機撫勦又聞自裏塘以外抵西藏其人敬瑚
必勒罕如神今瑚必勒罕之父現居西寧宗喀巴
寺應令其遣人遍曉裏塘營官等俾知

朝廷欲保護瑚必勒罕是以發兵往駐則羣番輯服
矣又疏言西藏資茶養生賊人雖據藏地非茶斷
難久居今松潘一路茶價甚賤應暫禁出口令裏

塘巴塘營官開造番寨戶口清冊酌量定數許其
買運自昏相率就撫事並下所司議行五十八年
二月疏言打箭爐以外番人尚多觀望不即就撫
若於草長時以兵臨之彼必不敢抗應選成都滿
洲兵五百綠旗提標兵一千化林永寧兵五百會
期由裏塘深入雖巴塘以外亦可傳檄而定

上命如議調遣即以法喇率赴打箭爐相機撫勦四月法
喇率滿洲兵駐打箭爐令副將岳鍾琪率綠旗兵

至裏塘曉諭投獻戶口冊番酋達瓦喇木扎木巴
弗從縛之偕其屬五人械送法喇營斬以狗撫定
人戶六千四百餘遂進師巴塘其酋喀木布第巴
等亦率屬迎降

詔法喇率兵駐守巴塘時年羹堯為四川總督

上允廷議令其撥兵二千赴法喇軍於來年由巴爾喀木
進定藏地五十九年二月年羹堯奏授護軍統領
噶爾弼為定西將軍統兵進藏撤法喇回打箭爐

駐防六十年正月年羹堯奏撤打箭爐駐防兵還成
都尋奏法喇宜與諸閒員並回京于是法喇還仍
任都統兼署護軍統領十月因護軍自戕不以實
奏革任六十一年逢

上七旬萬壽慶典宴滿漢諸臣六十五以上者千餘人於
乾清宮前名千叟宴法喇預焉

賜復原銜雍正十三年卒子拉薩哩官至正黃旗蒙古都
統見大臣表

佛倫

佛倫滿洲正白旗人姓舒穆祿初由筆帖式遷兵

部主事

聖祖仁皇帝康熙十五年遷詹事府中允尋遷工部郎中

歷少詹事游陟大理寺卿十八年擢內閣學士充
經筵講官時逆孽吳世璠尚據黔滇是年六月佛倫
奉

命同侍郎金鉉赴湖廣總理糧餉九月疏言進黔兵餉自

至鎮遠後皆資陸運因量設塘站數處集夫遞送
惟是黔民遭亂稀少請

飭將軍督撫招徠土民貿易以裨糧運從之十九年兼理
四川糧餉及賊平還京二十二年遷刑部侍郎二
十三年

命同吏部侍郎陳廷敬兵部侍郎阿蘭泰副都御史馬世
濟管理錢法疏請令各省有蘆課關稅之所辦銅
齋解寶源局以廣鼓鑄下工部議行二十四年調

兵部侍郎尋擢左都御史疏言科道各官有受囑
陳奏結黨誣陷及給假終養丁憂不在家靜守遍
遊各省挾詐督撫諸弊請嚴定處分下吏部議行
二十五年遷工部尚書二十六年二月調刑部九
月調戶部先是河道總督靳輔言高郵寶應諸州
縣下河宜築隄束水入海按察使于成龍以隄工
難成請疏濬下河及海口

上遣侍郎孫在豐往董疏濬事靳輔又言宜自高家堰起

加築重隄束各壩減洩之水出清口歸黃河而停
濟下河並請於隄外涸出田畝設官清丈以為屯
田可增錢糧百餘萬

上曰朕從利益民生起見非為錢糧著佛倫與侍郎熊一
瀟給事中達奇納趙吉士會同江南總督總漕確勘議
奏尋議應如靳輔所請二十七年漕運總督慕天顏疏
劾佛倫勘議河工皆從靳輔臆說不顧興屯之占
田厲民孫在豐疏言前佛倫與臣等會勘河工時

原議海口應濬擬有疏稿後忽改為加築重隄停濬海口之疏雖係佛倫主稿實靳輔陰謀御史陸祖修復劾佛倫往勘河工屯田二事左袒河臣不顧公議嗣奉

命九卿會議而主議者不過佛倫及尚書科爾坤左都御史格斯特等三四人即如屯田一節尚書張玉書左都御史徐乾學力言屯田所占民田應還業主而科爾坤等置若罔聞悉依佛倫所奏具稿其餘

九卿有不見議稿隻字者疏入下部嚴察議奏會
御史郭琇疏劾靳輔偏聽幕友陳潢阻撓下河開
濬又劾大學士明珠余國柱與佛倫結黨營私諸
款

上諭責佛倫往勘河工屯田所議偏徇且凡會議時挾私
好勝

命解戶部尚書任

召靳輔于成龍同郭琇及佛倫熊一瀟達奇納趙吉士入

對佛倫乃奏停屯田有丈出民田緊還業主其暫
設同知縣丞等官並裁汰於是部議佛倫應革職
上曰佛倫任工部時極力勤勞凡奉差遣亦能勝任但議
此事舛錯殊甚著留其佐領以原品隨旗行走逾月授
內務府總管二十八年山東巡撫缺

論大學士等曰山東紳衿最稱桀驁且好結朋黨宜簡用
風力之人為巡撫著以佛倫補授二十九年正月疏言
沂州等州縣衛所未完康熙二十八年錢糧請於

麥收後開徵

上曰山東本年地丁錢糧全行蠲免原欲使小民終年休息若帶徵未完舊欠必至借端滋弊著於三十年帶徵六月疏言東省賦役不均凡紳衿貢監戶下悉免雜差遂有奸民詭寄田畝規避徭役請通限兩月之內許其自首改正嗣後紳衿等田畝令與民人一例應役以釐剔積弊得

旨徭役不均偏累小民所奏改正釐剔具見實心任事並

不瞻徇直省應一體行七月疏言東省本年蠲免正賦

臣仰體

皇仁勸諭大戶酌減佃租一分至五分不等請嗣後直省
凡遇

恩免賦糧七分蠲免業戶三分蠲免佃種之民又言東省
本年豐收紳民願每石捐輸三合以為積貯合計
得穀二十五萬餘石用備荒歉疏並下部議行三
十年草職縣丞譚明命許吏部主事朱敦厚任維

縣知縣時焚賊事下佛倫鞫勘佛倫言敦厚加派
焚賊經前撫臣錢珏審實敦厚因免求原任刑部
尚書徐乾學貽書錢珏狗情銷案請

敕部議處乾學等皆褫職三十一年擢川陝總督明年西
安鳳翔饑佛倫請暫減二府額銷鹽引之半又言
西安駐防官兵糧草州縣苦於遠解請於距省四
十里可通水路之曹店設倉收兌事俱下部議行
三十二年冬入

覲

賜冠服遣回任加禮部尚書銜三十三年授禮部尚書三

十五年

上親征噶爾丹

命與大學士阿蘭泰尚書馬齊分班值宿禁城三十八年

授文淵閣大學士初佛倫任山東巡撫時疏劾左

都御史郭琇前任吳江知縣虧帑事且言琇父郭

景昌原名爾標係明季御史黃宗昌家僕曾入賊

黨伏誅琇私改父名濫請

封典應予追奪部議如所請三十九年二月郭琇以湖廣

總督入

覲具疏訟佛倫誣讎其父

上詰問佛倫以訪聞舛錯對下部察議應革職援

赦得免三月以前任總督時散給陝西籽種銀兩不確察

各官侵扣挪用諸弊應降四級調用

上命以原官休致明年卒四十四年

上諭大學士馬齊曰佛倫為總督時密奏涼州總兵師帝
賓騎射不堪朕諭以師帝賓為三屯營副將時騎射之
佳大臣侍衛皆知乃佛倫終劾之而佛倫亦于此壞名
又密奏趙良棟不可居寧夏乞召赴京師後良棟來朝
朕命之歸良棟奏曰有人言臣不宜居寧夏臣不便歸
朕問何人良棟言佛倫以告索額圖而索額圖語臣以
此觀之人之無耻未有如佛倫者凡密奏之事皆朕親
手封發即左右人亦不得見此皆體密奏者之心而重

其事也佛倫自行密奏而反以告人猶可比之人數乎
四十九年戶部虧空積年承辦草豆銀兩事覺

上命從寬就現在得贓人員於未審之前以所得之銀歸
款免其草職拏問因

諭諸大臣曰戶部弊端始自尚書科爾坤佛倫後來諸臣
因循成習以至於此凡為大臣者理應廉潔自守黽勉
從事方為無忝厥職也

荆山

荆山滿洲正白旗人姓費莫康熙二十五年由監
生補禮部筆帖式尋任本部讀祝官二十八年遷
太常寺寺丞三十九年遷戶部員外郎四十四年
擢太常寺少卿四十六年晉本寺卿五十年轉大
理寺卿五十二年授禮部右侍郎五十三年充纂
修

玉牒副總裁官五十四年四月署倉場侍郎事務七月疏
言泗洲等衛糧艘在通州張家灣遭風損十一隻

沉米五千二百餘石內河向無題豁例但今歲北
河水發風大溜急無異江河請

賜豁免

上允之十一月疏陳漕運倉糧事宜一漕艘至濟寧臨清
等處河水淺阻請交山東撫臣派司道督催出境
一水次兌糧向有樣米及船到起卸迥不相符皆
運丁偷米攙糠所致請令該糧道將各倉兌米一
袋鈴封到淮漕督折驗加封抵通日臣等率坐糧

廳對驗起卸一漕糧掛欠例將弁丁留通勒限賠
補逾限不完者發回本省陸續追取搭運甚為繁
滯請即於本年發回令速賠補一京通廠座號房
多坍或以蓆囤收米何堪久貯請派滿漢堂官各
一揀選賢能司官料估修造限內倒壞原辦賠修
九卿會議如所請奉

旨依議五十五年閏三月順天永平二府饑奉

命監視散賑六月授禮部尚書五十六年三月卒

賜祭葬如例謚端簡子德音由內閣中書遷侍讀康熙五十二年擢內閣學士六十年授山西巡撫雍正元年四月以匿報平定州壽陽徐溝等縣旱災又不
停徵部議革職尋授內閣學士因巡撫任內州縣虧欠錢糧逾限未完降一級調用七年卒

開音布

開音布滿洲正白旗人姓西林覺羅初由筆帖式授內閣中書累遷兵部主事內閣侍讀工部郎中

詹事府少詹事

聖祖仁皇帝康熙二十六年八月授光祿寺卿十月遷都
察院左副都御史會湖廣巡撫張汧為御史陳紫
芝劾奏劣款

命開音布同直隸巡撫于成龍山西巡撫馬齊往訊得實
論罪如律二十七年二月擢戶部右侍郎三月

命監理高郵寶應下河工程十一月疏言工所需用夫役
甚衆應於高郵等十一州縣內各派夫千名即有

添設不得過二萬之數前在河工官員有諳練河務者請選用五十員以供臂指又請濬串場河並丁溪草堰白駒石碓及河梁場車兒埠淄子竈至苦水洋諸處事俱下部議行二十八年正月

上南巡過淮安

命侍郎徐廷璽巡撫于成龍閱視下河還奏自丁溪至白駒有通海口之三處及丁溪上流之馮家壩河道應仍挑濬其串場河石碓諸工可悉停部議下河

工程減停應歸河道總督王新命管理

上因命開音布還京授正白旗滿洲副都統先是高郵州民以車邏鎮三壩放水致淹田麥控訴開音布疏劾州同茹兆相千總馬崇貴私開壩閘

詔尚書張玉書等察審以三壩各閘例於四月朔開放開音布誤劾覆奏下部議開音布降一級留任罰俸一年尋擢提督九門步軍統領三十年二月

上以京師外城巡捕三營舊為兵部督捕侍郎所轄與內

城不相聯屬

命改隸步軍統領下九卿等詳議改鑄提督九門步軍巡捕三營統領印總司內外城捕務所獲逃盜等犯移送刑部完結三十三年五月

天壇外新修道路工竣開音布奏言新修之路聽人照常行走不久又壞應派綠旗兵看守令往來之人止走兩旁勿行中路

上曰如此禁約殊於朕意不合蓋修葺道路專以便民也

若派兵看守不許行走則修之何用且云禁行中路看守之人必并禁及兩旁不便於民應仍聽人照常行走後若毀壞令步兵稍稍葺治三十五年八月擢兵部尚書仍兼步軍統領九月疏言巡捕事務繁要請添設郎中主事各一員下吏部議行三十六年九月授鑲白旗滿洲都統解尚書任三十八年九月以年老

命解都統任專管步軍統領事四十一年五月卒於官

賜祭葬如典禮謚肅敏

常蘊

常蘊滿洲正白旗人姓赫舍哩由筆帖式考授內閣中書康熙三十年遷侍讀三十四年遷慎刑司員外郎三十九年授江南海關稅務監督四十年補

盛京戶部員外郎四十三年授翰林院侍講學士充日講起居注官四十六年改內閣侍讀學士五十二

年遷內閣學士充

經筵講官五十六年四月擢兩江總督六月疏言松江府上海縣距海口五十餘里洋船水手良頑不一更有居民漁戶貿物採魚小船往來不絕或偷運米送洋船查上海惟守備一千總一把摠二兵二百七十五分防外無幾請將提標右營兵移駐上海其原駐上海之黃浦營改為水師增大沙舡三哨舡四巡查海口五十七年疏言江南濱海要區

額設大小舡皆巡海必需一日不宜空缺今營船
同時修造恐誤巡防請屆期先修一半仍留一半
在汛以俟續修並責成布政使確查不許尅減工
料如船不合式及捏報當修冒領工價將承辦各
官叅處並下部議行五十八年疏叅潁州知州王
承勲許安徽布政使年希堯鳳陽府知府蔣國正
勒索規禮因蠲民欠錢糧國正將伊應賠所屬
虧空帑銀三千餘兩捏報民欠冒蠲侵蝕請離任

質審

上命左都御史田從典副都御史汪沂往審嗣從典等訊
國正受承勲規禮八百餘兩又將應賠銀混入民
欠冊內屬實希竟失察俱論如律五十九年三月
疏言商舡出洋例禁大礮許携鳥鎗腰刀近每見
沿海州縣鬪毆抄搶等案多鳥鎗傷人應將洋船
鳥鎗盡繳官私藏者按律治罪從之七月
上以直省錢糧虧空甚多應立法清釐

命各督撫議奏常盈疏言州縣虧空錢糧或知府有扶同徇隱情弊別經發覺者將知府叅革獨賠又州縣官恃有上司分賠之例將庫銀藏匿假捏虧空應令督撫核實題叅嚴加議處其假匿虧空銀兩獨於該州縣名下著追下部議如所請六十一年卒於官先是常盈劾兩淮巡鹽御史張應詔科派商人請交部嚴加議處商人程庭等治罪

上命工部尚書李先復等察審先復覆奏應詔科派屬虛


部議以衆商已供應詔科派今常鼎身故遂改前
供所審未協雍正元年

諭曰朕聞常鼎居官本無令名

皇考亦曾向朕言之其所奏豈可為準且

皇考當日不肯據常鼎所奏定案故遣大臣察審今既已

審明不必再行駁詰况張應詔本無科派之事真實難
掩衆商安得不改易前供乎其叅奏不實之常鼎已故
免議



欽定八旗通志卷一百六十

欽定四庫全書

史部

欽定八旗通志卷一百六十一

欽定四庫全書

欽定八旗通志卷一百六十一

人物志四十一

大臣傳二十七

滿洲正白旗六
牛鈕 齊蘓勒 布蘭泰 來保

鄂彌達

布蘭泰

布蘭泰滿洲正白旗人姓拜都初隸蒙古鑲白旗
父克什圖由護軍校從征察哈爾布爾尼叙功給

雲騎尉世職康熙三十七年布蘭泰襲五十七年
授理藩院員外郎兼管副叅領五十九年赴北路
軍營管理鄂勒齊圖鄂勒臺站六十一年還京調
戶部銀庫員外郎兼公中佐領雍正元年因前管
理臺站節省錢糧議叙以應陞缺即用二年七月奉
詔編布蘭泰及孫柱五十三石音四族丁為一佐領令布
蘭泰掌之拔入滿洲正白旗八月遷太僕寺少卿
仍兼銀庫行走十一月擢山東布政使三年七月

因銀庫盈餘議叙加二級九月署山東巡撫十月
授山西巡撫尋調湖南巡撫四年疏劾衡山縣知
縣張翼飲酒觀劇不轉解人犯并不肯接詞狀請
革職

論曰張翼各款俱屬應叅之事但稱不肯接受詞狀此語
甚屬錯悞民間詞狀虛妄者多一概接受必啟刁民誣
告健訟之端此風斷不可長若以收受詞狀之多寡定
屬員之賢否則必致以此相尚生事滋擾矣五年二月

奏請復靖州州判增糧道庫大使改五寨司吏目
為巡檢裁松栢市巡檢從之三月疏言湖南襟江
帶湖港汊繁多每有不法船戶糾匪肆竊或合資
買舟假貿易為名沿途行劫皆因無可稽查請嗣
後一切小船照沿海商船例地方官取船戶鄰佑
保結編號給照不時稽查至漁船奸良更為難辨
請照陸地保甲例編十船為一甲一船犯盜竊許
九船公首隱匿事發同甲一體治罪下部議行四

月授戶部右侍郎仍署湖南巡撫五月調江西巡撫十一月疏劾陞任蔚州叅將裴魁前在撫標遊擊任內虛冒馬糧二分步糧三分守糧六分請革職究追

諭曰武弁虛冒糧餉幾分較有司之貪贓枉法累及國計民生者似有分別該上司等應預行嚴飭令其悔改為國家愛惜人才若切加訓誨仍不遵奉則當叅革治罪今布蘭泰到任伊始尚未教導屬員遽以空糧幾分將

裴魁奏未免過刻若督撫等皆如此叅劾恐有用之才受微愆之累而不得改過自新者多矣朕念裴魁從前効力從寬免其究問着降三級留任六年正月請移貴溪縣縣丞駐江浙山從之三月疏言九江為數省孔道贛州為商賈雲集之區積貯宜預籌請各設常平倉自本年始將兩關平餘銀及所裁冗役工食并公私雜項所減銀每年買穀二萬餘石分貯兩關平糶秋收買穀增貯積十年可得二十餘

萬石其建倉費卽於兩闕節省項內動給

詔如所請行七月疏劾清江縣知縣牛元弼不親身禱雨
屠宰甫禁旋開筵演戲且不理政務知府吳恩景
代為隱飾請一併革職

諭曰牛元弼於屠宰開禁之後開筵唱戲不比祈禱之時
若牛元弼性好聲歌耽於逸樂則布蘭泰何以不早行
奏奏至所參政務不理亦當實指其廢弛者何事今因
一時意見遽將該縣嚴參並知府一同革職定例內屬員

犯貪贓重罪者知府徇庇及夫於覺察其處分止降級調用今因屬員唱戲而遂將知府奏請革職似此越例之事幾有作福作威之意矣朕之待督撫大臣深加信任常有督撫叅劾尚輕而朕從重處分者總以揆情度理期於公當而已凡為督撫者當為國家愛惜人才而於叅劾之間尤當加意慎重若誤去一幹員其過更在誤薦劣員之上蓋薦一劣員而誤用之異日自然敗露若將幹員誤行罷斥則其人終身放廢不可復振天

下人才幾何豈可因一時之喜怒而濫行推折乎察吏之道公明二者缺一不可若存心本公而識見不到必致為屬員所欺瞞浮言所蒙蔽布蘭泰之存心雖無私徇而少知人之明且瑣屑不識大體地方雨暘之時若水旱之為災全係督撫大臣之感召若果能布德行仁安民察吏自能上感

天和豐亨有慶若政事有關舉劾失宜以致雨澤不能應時而降此時徒恃祈禱之虛文已屬庸鄙之見而乃欲

諉過於屬員以謝已之責不亦屈抑之甚乎牛元弼吳
恩景不必革職若二人任內另有虧空劣蹟著布蘭泰
查明續奏再降諭旨若別無款蹟可叅著將牛元弼吳
恩景送部引見候旨另用八月以署江蘇巡撫張坦麟

為江西巡撫

命布蘭泰來京十一月

諭閣臣曰江西布政使王承烈陞任來京奏稱布蘭泰在
江西巡撫之任每事過於嚴刻朕因著令來京面加詢

問布蘭泰本一微末之人朕因其居心謹慎操守尚好是以歷任擢用為湖南巡撫後見其居官辦事識見褊小已降旨調回授為侍郎適江西巡撫未得其人復將伊調撫江西並諭伊云江西事務自邁柱整頓之後汝可遵守安靜辦理乃伊到江西後復蹈故轍並無改悔之念伊兩任內所辦之事所奏之摺朕見其苛刻瑣細不知為政大體朕隨事切加訓誨所以批諭之者剴切詳明至再至三現在收貯俱發與大臣及王承烈看過

原不待王承烈之陳奏而後知之也所以將伊調回者
意欲面行詢問並加訓諭尚冀其或能悛改乃伊奏稱
臣在江西所辦事件往往從重從嚴待皇上敕改使恩
出自上朕一聞此語心中為之戰慄不覺汗流浹背夫
辦事之道惟在秉公得理中正無偏今有意嚴刻先為
過甚以待折中必朕留心體察方得更改而伊又未豫
先奏明朕又安從逆料其有心過嚴而事事皆為駁正
乎况巡撫所辦地方事務不陳奏於朕前者甚多安可

豫存嚴厲之見乎布蘭泰深負朕恩溺職已甚著革職尋
命留雲騎尉世職於本身赴多倫諾爾承修廟工十一年
偕原任侍郎衆佛保赴北路軍營督理馬政乾隆
二年六月署鑲紅旗蒙古副都統十一月授鑲黃
旗滿洲副都統三年疏言各部院所存檔案一代
章程所繫宜慎家收貯逐一清查分別年分貯冊
庫專員典守如有應查事彼此行文咨查不許擅
自調取亦不得私相傳閱至八旗檔案亦宜按年

編號令印房筆帖式掌之筆帖式任滿及叅領等更替時出結交代下部議行尋

命署馬蘭鎮總兵四年八月條奏行保甲州縣多虛應故事兵丁緝匪解送有司置之不問緝盜應委千把總同兵丁緝拏事主報盜應連結嚴究衙役需索倉穀耀借秋成買補不必輟轉累民

勅下大學士九卿議奏議上

諭曰大學士九卿議覆布蘭泰條奏各款朕一一詳閱

所議亦是但語多籠統尚少切實如布蘭泰奏稱州
縣行保甲之法虛應故事即有匪類兵丁訪實解送
有司置之不問等語爾等議覆即當詢布蘭泰伊現
任總兵何處武弁訪實匪類交於何州縣如何置之
不問之處令其據實陳奏如果有其事則州縣即當
叅劾而失察之總督亦應有處分倘毫無實據豈得
妄以置之不問一語加之文員如此則真偽不難立
辨今但以武弁何難通報上司按例查叅等語引成

例議覆以後弁員視為具文或竟不具報其弊不更甚耶此處殊未明晰至布蘭泰所稱督撫遇地方有盜即委千把同兵丁探拿盜自可弭等語夫盜案委武員躡緝惟李衛為總督時偶一行之其餘督撫從無如此辦理者蓋武弁緝盜行之不善不但於地方無益且恐轉滋擾累弊端百出此則事之必不可行者又布蘭泰奏稱無論犯竊幾次贓數多寡重則治罪輕則解回原籍至事主報盜應作速完結毋令

守候並嚴究衙役需索等語爾等議覆竊盜科罪輕重各有明條從無不論次數職數混行問擬及外來匪類不行解回原籍之事並事主報盜止許到官聽審一次認贓一次不得拖累並不許衙役需索違者將承審官嚴加議處現在遵行等語此在成例則果然矣而州縣中或不實力奉行又或奉行不善豈能保其全無布蘭泰既為此奏必有所指亦當令其指名陳奏不應僅稱無庸議也又布蘭泰奏稱社倉常

平倉之穀如有糶借秋成即可買補何必多此買穀
輾轉累民囤積自官其價愈昂等語爾等既議稱如
或市價增長及民間購買者衆官即暫行停糶是布
蘭泰所奏廷議亦以為是何以又云布蘭泰並不深
究其原遽思更變其法殊未允協此則幾有明駁暗
准之意矣夫採買米穀亦原以備民食今前後詞意
未符將來或須採辦又將如何料理此摺發還著另
議具奏尋議令指名陳奏布蘭泰覆奏臣前任湖南

巡撫時有余景福顏正黃鰲謝祿正等肆劫皆地方官不留意懲治致動擾官兵本年赴馬蘭鎮任詢訪軍民稱窮鄉遇竊事主恐守候多隱忍不報是以冒昧陳奏非別有所指

諭曰布蘭泰摺拾舊事妄作空言冒昧具奏不合著交部議處部議降一級調用得

旨降一級從寬留任六年暫署

三陵總理事務九年實授馬蘭鎮總兵十二年疏言八旗

漢軍壯丁例得撥補馬蘭綠營兵缺且給攜眷車費往往視為畏途致缺久懸或隻身而來請嗣後撥補時先儘有眷丁定限啟行又壯丁子弟有堪充餘丁者遇缺出就近挑補可省撥送車費從之十一月丁憂回京十三年復署馬蘭鎮總兵十四年二月以守護

園寢不嚴部議降一級調用得

旨降三級從寬留任十月擢古北口提督尋疏言綠營

操演鎗礮原期施放有準但轉身進退或左或右多
不畫一因營員各持所見日更月改請照八旗式
法自左而進自右而退畫一操演如所請行十七
年卒

諭曰布蘭泰歷任封疆宣力有年今患病溘逝深為軫
惻應得卹典該部察例具奏尋

賜祭葬如例謚愨僖子永貴襲世職官至協辦大學士
吏部尚書別有傳

來保

來保滿洲正白旗人姓喜塔臘康熙三十八年由庫使在批本處行走三十九年奏事處行走四十年授藍翎侍衛四十六年以失儀革職五十年授三等待衛五十五年以奏事錯悞革職五十七年復授三等待衛遞擢一等待衛雍正元年正月管理南苑事二月授佐領四月授內務府總管三年二月兼理奉宸院事十一月內府披甲人等因議

裁額聚閑廉親王府復劫總管李延禧家來保等
奏不實革職四年五月授

景陵掌印郎中八月授

三陵總管九年還京

遣往土爾扈特給二品頂帶十二年赴喀爾喀車臣汗部

辦事十三年十月還京仍授內務府總管署工部

尚書十二月奏言滿洲騎射較優于漢人沿邊古

北口一帶提鎮副叅遊守等官請兼用滿洲于控

制為宜從之乾隆元年三月總管

咸安宮學十二月大學士管浙江總督稽曾筠江蘇
巡撫邵基疏請停辦戊午年銅運以清積欠下部
議來保奏言積欠數盈五六百萬自應停辦一年
以清舊項但已未以後仍招商採買行之數載積
欠復多則停辦之請又難不允臣查戶工銅儲積
數十年方餘一歲鼓鑄之用今既停辦一年合以
從來所欠缺額約及二年目下市中錢價已覺稍

昂停辦之說既行錢價之昂必甚請

救下該督撫等出示曉諭聽商人自携資本出洋採買
不必先給價值該道隨到即收毋拘多寡但不得
剋扣抑勒重滋商累總理王大臣議覆允行二年

六月

上以運河水淺糧艘至臨清以北尤多阻滯由于衛水
上游各渠口居民私洩過多

救直隸河南督撫等照前河臣靳輔題定例稽察嚴禁

來保奏言水淺運阻查禁不得不嚴但衛水發源河南至臨清五百餘里沿河居民不知幾千萬家需灌之地不知幾千百頃現今秋成在望已非灌溉之期所慮者有司奉行過當後雖運河不至淺阻而一入五月渠口盡行堵塞坐使有用之利置之無用恐不無廢時失業者非我

皇上仁育萬民之意也其如何使漕運不致淺阻民田亦得灌溉抑或暫禁于淺阻之年而不禁于深通

之歲應令督撫河道諸臣悉心調劑以期兩便疏
入

命侍郎趙殿最侍衛安寧會同各督撫查勘酌議事詳
殿最傳十二月實授工部尚書兼議政大臣四年
八月以病請解任

上不允十二月授內大臣

賜紫禁城騎馬五年調刑部尚書充律例館總裁初來

保世隸內府六年正月

上以其奉職勤勞

特命擡入正白旗所立佐領准世襲三月充繙譯鄉試
正考官四月管右翼監督六月御史沈世楓疏奏
來保誠懇有餘習練不足不勝刑部繁要之任

諭曰來保人實可信然沈世楓所言頗中其病倘因此
能自知省惕則心志虛公而才識亦將日進矣此聞過
而喜所以稱賢也七年

上以來保善相馬

御製相馬歌賜之曰伯樂善相馬車下老驥出今豈無
其人來保稱第一曩時有黃海親授相馬術謂不相
其皮亦莫稱其力心端德自優萬中無一失天閑雲
錦羣一顧靡不悉為余辨驪黃六飛協安吉此術固
云美相人亦可則况茲居八柱亮采汝所職勉此空
冀心佐予敷九德是年因審擬福海毆斃贖身家人
焚屍滅跡一案擬罪乖錯

詔革職從寬留任九年御史和其衷疏劾奉天將軍額

洛圖尅扣軍餉勒派旗民并因建橋受賄狀

盛京工部侍郎留保奏請將瑚納瑚海等處所收木
稅令各監督遵例報部查核上年建橋時多伐木
植請著落城守尉巴海率商折銀交納

命來保偕祭酒鄂容安往會同侍郎兆惠查審議奏八
月來保等覆奏額洛圖所犯屬實應論罪如律留
保所請二事皆可行從之十年三月調禮部尚書
總理樂部兼管太常寺鴻臚寺事加太子太保四

月授領侍衛內大臣十二月充

玉牒館副總裁十二年三月管左翼監督是月授吏部尚

書協辦大學士十二月晉

武英殿大學士十三年六月教習庶吉士九月

命為軍機大臣十一月充

經筵講官十四年二月金川凱旋議叙晉太子太傅

三月兼管兵部事四月解兵部兼管刑部事充平

定金川方略正總裁九月仍兼管兵部事十五年

三月來保七十生辰

賜之以歌曰七十古稀亦常有綸閣中人不多覲居然
台袞臻黃耆平生誠謹獲福厚金門朝夕宣勤久
鮑背精神尚抖擻漢萬石君令其友作歌春酒為鄉
壽詞取易達卿祇受勉力贊襄予左右十六年兼管
吏部事充詩經館正總裁二十年七月充平定準
噶爾方略正總裁二十五年來保年八十復

賜詩曰八袞黎皐弟祿增

三朝禁近亮勤稱溫城過關毋忘下東海為問知有興矍
鑠齊眉叶琴瑟徘徊繞膝侍孫曾皤皤元老多黃髮
自是明廷大吉徵二十六年五月兼管禮部事二十
九年三月卒

諭曰大學士來保老成端謹誠篤恪勤年躋大耋久任
綸扉宣力

三朝勤勞懋著前以患病特命御醫診視並賜參餌以冀速
痊昨具摺陳情降旨慰留但令不必兼理部務茲聞

溘逝深為軫悼著加贈太保入祀賢良祠并賞銀三
千兩辦理喪務朕親臨奠醊應得卹典該部察例具
奏

御製詩悼之曰一世篤勤行

三朝禁近臣老成惜多謝厚重有誰倫那問生由命因知
壽底真且看市廛上應有輟春人尋

賜祭葬如例謚文端四十四年

御製懷舊詩列五閣臣中

詩曰初供批本職後充侍衛護弓矢固所習慤勤更其
素止進恒有常不失尺寸處洊陞掌內府亦久蒙

恩遇因命長部曹旋贊絲綸布更踐既已深老成遂獨許
雖無赫赫名却有休休度讀書通大義萬石猶後步

牛鈕

牛鈕滿洲正白旗人姓他塔喇由官學生補工部
筆帖式康熙三十九年二月武清縣筐兒港水決
工部尚書薩穆哈遵

旨派賢能司員筆帖式監修以牛鈕監築減水壩六月補
本部主事五十年二月

上自和韶屯乘舟閱工

諭於引河前崖及減水壩前各增壩一於三里淺挑水壩
下又增壩一俱長三四丈

上至河西務登岸步行二里許

諭牛鈕曰濬河不礙村落方善復

指示曰此沙地著濬河寬十丈長四百七十餘丈平坦處

深四五尺高阜處或七八九尺不等其河灣處著建小挑水壩二濬河之土即置兩邊對新河上口舊河下流著建挑水壩二高與岸等於是取儀器置地

親視方向

命諸皇子大臣等分釘椿木紀丈量處交牛鈕監修三月遷本部郎中五十九年擢左副都御史尋

命總管北運河事務六十年九月河南武陟縣馬營口河

決

上以牛鈕詣練河工

面授方略偕侍講齊蘇勒等往堵築十月以巡撫楊宗義
與河督趙世顯互諉不亟備料奏

敕宗義專其事牛鈕恪遵

聖訓在釘船幫興工十一月工竣奉

旨詳勘河工自孟津起至清口止以儀封縣白家樓虞城
縣黃垆壩徐州以上碭山縣定國寺及胡家樓徐
州以下長樊大壩五處應挑引河邳州董家塘

宿遷縣大古城桃源縣七里溝三處應建挑水
壩奏交署河督陳鵬年督辦六十一年二月直隸
長垣縣常村集堤南水勢暴漲逼山東濮州等處
遣牛鈕順道往勘會黃河積凌水發馬營口復決牛鈕馳
還武陟同宗義於秦家廠堵築六月奏言秦家廠
攔河壩自三月興工擇於本月初五日合龍初三
日大雨水漲所留水口稍狹兩邊壩臺蟄陷二十
七丈幸埽個未動已屬楊宗義備料趨修臣以大

雨時行通州運河亦屬緊要即遵

旨回京

諭宗義速行堵修先是牛鈕議於黃河北岸自沁河堤至
詹家店十八里無堤處接築遙堤以資捍禦宗義
以沁黃並漲時水無所洩恐致衝決不若仍留空
隙備宣洩雍正元年正月河督陳鵬年奏現在河
勢北趨較前情形不同無堤攔束亦屬可虞請如
牛鈕議從之七月遷兵部右侍郎八月疏禁官民

人等服用五爪龍下部議行二年七月疏言江寧
杭州荊州京口廣州福州等處駐防兵請令習水
師部議江寧等處俱係防守地方並無戰船未便
學習惟京口現設戰船應如所請令將軍選兵二
千操演得

旨先行十二月調禮部右侍郎三年二月因遲延應奏事
件降三級調用七年三月覺羅巴哈布首牛鈕監
修筐兒港堤工時索其金三百銀千四百兩宗人

府傳詢牛鈕抗不赴

諭曰牛鈕貪婪無恥其嚇詐之處甚著人所共知乃宗人府傳喚數次抗不前往甚屬可惡著革職拿交刑部治罪尋議照枉法贓擬絞監候從之八年正月北運河青龍灣議築減水壩以侍郎何國宗督修

諭曰原任侍郎牛鈕在北運河管工年久於地方情形甚為熟練爾等可會議料理牛鈕即偕何國宗抵海口溯引河而上估工條議以

聞得

昔作速料理少有遲誤疎虞惟何國宗是問一應動用錢糧與牛鈕無涉著何國宗一人察核工竣回京乾隆二年七月卒

齊蘇勒

齊蘇勒滿洲正白旗人姓納喇初由官學選天文生為欽天監博士遷靈臺郎尋以內務府主事出任永定河分司康熙四十二年

聖祖仁皇帝南巡閱河齊蘇勒隨至淮安奉

諭曰朕觀黃河險要地方應下挑水埽壩現今永定河朕親指示挑水壩俱有裨益爾遵照朕指示式樣前往烟墩九里岡龍窩三處築挑水壩數座於朕回鑾前完工

齊蘇勒遵

旨如期竣事乃回任洊遷翰林院侍講國子監祭酒仍管永定河分司事務會奉

命同副都御史牛鈕監修河南武陟等縣決口隄工奏自

沁河隄頭至滎澤縣大隄十八里平行處接築遙
隄使全河之水盡歸一道專力刷深不致勞溢六

十一年十二月

世宗憲皇帝授為山東按察使兼理運河事

命先往河南籌辦黃河隄工時河南巡撫楊宗義奏請於

馬營口南舊有河形處修挑引河齊蘇勒同河道
總督陳鵬年疏言河不兩行此洩則彼淤有必然
之勢馬營口甫經築堤若開引河有旁洩侵隄之慮

寢其事雍正元年正月

命齊蘇勒署理河道總督尋寔授四月疏言陽武祥符封
卽界黃河北岸有支流三逼隄繞行五十餘里南
岸青佛寺邊有支流一逼隄繞行四十餘里不急
為截斷恐刷損大隄已築壩堵絕並接築子隄九
千二百八十八丈隔隄七百八十丈會奉

詔豫籌山東諸湖蓄洩事宜以利漕運疏言汶上縣之南旺
馬踏蜀山等湖東平州之安山湖濟寧州之馬

場湖魚臺縣之南陽昭陽獨山等湖滕嶧二縣之
微山郝山等湖皆運道所資以蓄洩昔人名曰水
櫃因土人乘酒佔種漸致狹小宜乘湖水稍落時
除墾熟田畝外文量立界嚴禁侵佔設法蓄水如
遇運河水漲引注湖中相平即築堰截堵遇運
河水淺則引之從高下注其諸湖或應築隄栽樹
或應建閘啟閉令各州縣循例辦理則湖水深廣
運道流通漕艘無阻滯之虞矣八月奏言洪澤湖

水微弱黃水有倒灌之勢臣率道廳督築清口兩岸大壩各寬八丈東長二十六丈七尺西長二十四丈中留水門五十丈東高清水以抵黃現在淮水暢流惟此壩在洪濤大溜中兩面受敵必須加意修防因派工員協同汛弁率領河兵一百長夫三百常川住宿工所多備埽料椿繩等項如遇湖漲壩工稍有墊陷即用料加鑲下埽搶護遇黃漲即用混江龍鐵篦子諸器駕小舟往來疏濬不令

少停焉九月奏報秋汎已過河工平穩得

旨下部優叙加三級

特賜戴孔雀翎二年四月廣西巡撫李紱將之任

上諭及淮揚運河淤墊年久水高于城危險可虞李紱奏
言若于運河之西另挑新河一道以所挑之土另
築西隄而以舊河之身作為東隄則東面永無潰
決之患

上即命李紱往會齊蘇勒商酌齊蘇勒奏言淮揚運河綿

長三百餘里上接洪澤下通江口河之西岸逼臨
白馬寶應界首諸湖水勢汪洋一望無際今若
改挑新河築西隄于湖水之中畚鍤難施東岸之
閘壩涵洞皆湏另行創建不惟糜費千百萬帑金
而且大工終難告就

上是其言九月奏報秋汛得

旨齊蘇勒督率屬員修築壩隄堅固雖河水泛漲而各工

無虞甚屬可嘉下部議敘

持予騎都尉世職是時

上知臣下有與尚書隆科多總督年羹堯黃緣結交者

諭齊蘇勒曰爾之勤勞固不待言而一塵不染獨立不倚
從未聞黃緣結交更屬可嘉又

諭曰近日隆科多年羹堯大露作威福攬權勢光景朕若
不防微杜漸此二臣將來必至不能保全爾等皆當疎
遠之隆科多止論爾操守平常而年羹堯前歲數奏爾不學無
術必不能料理河務朕以此知爾之獨立也三年二月

副總河嵇曾筠奏請挑挖祥符縣回回寨引河

詔與齊蘇勒商酌嵇曾筠復奏言亟宜乘汛水未發興工
不及待會勘既而齊蘇勒至武陟奉

詔同總督田文鏡察視引河有無裨益齊蘇勒奏言挑挖
引河必須上口正對頂衝而下口有建瓴之勢方
可吸引大溜歸入新河借其水力滌刷寬深嵇曾
筠所挖引河工已將竣臣往看上口之地勢與現
在水向不甚相對改挖上首三十餘丈以對頂衝

以迎大溜又往對岸指示建築挑水壩挑溜順行以對引河之口俟水漲時相機開放庶河勢得以直暢東注而南岸隄根可保無虞耳奏至

諭曰朕慮稽魯筠或料理未妥今覽奏方慰可謂得法矣

七月

命內閣學士何國宗偕測算官員攜儀器閱河遇齊蘇勒所駐近地會同勘視齊蘇勒尋奏言

皇上頒發儀器測度地勢於河工高下之宜甚有準則今

洪澤湖滾水石壩舊立門檻太高不能隨勢洩水
請

敕閱河諸臣于明春視海口後遠至湖隄用儀器測度地
勢改落石壩門檻庶全湖宣防有賴又奏言治河
物料葦柳為先每年捲埽之葦輒千百萬束俱動
帑購買仍須以柳枝為骨在官園伐以濟用柳多
則工堅而帑省柳少則用葦多而工不固臣於去
冬勸令道廳等官及標下營弁各於空閒之地栽

種柳秧陸績據報一百二十三萬二千餘株今
通行察閱除枯損之外成活八十九萬二千餘株
又臣往來看工見山東江南蓄水沮洳之地皆可
種葦今春令廳員買葦根試種近據報徽山湖邊
種葦八頃餘畝蔓延青蔥此皆各官自願試種非
邀議叙者今行之已有成效應請

敕部酌定嗣後議叙之例以種柳八千種葦二頃各紀錄
一次為率並責成專汛守備及千把總培養柳枝

遇枯損即為栽補違者分別議處如此三五年柳
株處處成林湖葦叢生不費購買而工料充裕矣
事並得

旨允行十二月奏言河臣薪水舊由各廳供應每年有一
萬三千餘兩臣奏明禁止並裁革四季節禮又河
標四營舊有坐糧四十分每年一千一百餘兩臣
到任後交中軍為修造墩臺製換盔甲器械之用
其鹽商陋規銀二千兩為出操驗兵賞功犒勞等

費而每年往來勘估及伏秋兩汛駐劄三省適中
之地隨役及卷案不可減省凡車馬舟楫日用米
蔬之需遠者數百金近者一二百金前此尚可勉
強支持今春由徐州赴武陟拮据寔甚現據河庫
道張其仁言庫收額解錢糧向有隨平餘銀四千
兩除道衙日用及各項工食不過千金餘銀三千
兩請支銷看工車船等費臣因未經奏明不敢擅
便倘蒙

恩賞給則看工之盤費弗缺益得殫竭心力辦理河務矣
奏至得

旨此項通融取用甚好卿之清勤朕所深悉勉為之四年

四月奏睢寧縣朱家口黃水驟長東岸壩臺大埽
蟄陷現在防守修築

上諭大學士曰齊蘇勤在工年久歷練老成清慎勤三字
均屬無愧今年已望七見壩埽蟄陷必晝夜焦急朕甚
憐之且此時勉強施工將來伏汛秋汛恐又不免衝決

可令酌量情形不必急迫齊蘇勒尋秦水復大漲壩埽
倏臨水底凜遵

聖諭俟過伏秋二汛并力備修十二月奏報朱家口決口
堵閉合龍黃河自豫省至海口西岸壩隄完整

諭獎其悉心任事經理有方加太子太傅五年以裒病奏
遣太醫齋葺診視尋入

覲

諭嗣後歲支養廉銀萬兩六年兩江總督范時繹江蘇巡

撫陳時夏奉

詔開濬吳淞江因於陳家渡築壩松江知府周中鉉率把
總陸章乘船督工下埽值潮迴溜激壩陷船傾周
中鉉陸章俱歿於水事

聞予卹贈齊蘇勒知濬工未竟即前往經理其事尋奏言
吳淞江陳家渡舊有土梗三道未曾挑清致有停
沙淤塞之患今築壩開濬適逢江水海潮並長刷
淨土梗檻根毫無阻滯工程可期速竣

上諭部曰吳淞江工程雖交與齊蘇勒一同料理寔則范
時繹陳時夏應辦之事齊蘇勒一聞陳家渡壩工衝塌
即親往踏看悉心經理仰賴

神佑水勢湧長將泥沙徹底刷淨水無阻滯工可告成此
即封疆大臣實心為國為民感名

天和之明驗著從優議叙尋部議加三級七年正月以疾
劇奏

上命江蘇巡撫尹繼善署理河道總督復

遺太醫診視齊蘇勒疾二月卒得

旨齊蘇勒忠誠為國志行端方操守潔清辦事明敏自簡
任河道總督殫心竭力奉職勤勞週年黃水安瀾運道
通順隄工堅固河帑核寔厥功懋著令聞溢逝深為軫
惻應得卹典照例議奏外著加恩晉三等輕車都尉照
例承襲並賞給藩庫銀三千兩為歸櫬之資起程日同
城文武官齊集奠送沿途地方官親往奠醊並撥兵護
送歷來河道總督如靳輔齊蘇勒二人寔能為國宣勞

有功民社著尹繼善等就近擇地為靳輔齊蘇勒合建
祠宇令有司春秋致祭以昭朕優獎功勳至意

賜祭墓如典禮謚勤恪以其子華善襲三等輕車都尉世

職八年

詔建賢良祠於京師齊蘇勒與靳輔並入祀

塔勒瑪善

子伊柱

塔勒瑪善滿洲正白旗人姓薩克達由拜唐阿授
佐領雍正二年累遷至副都統九年大兵勦噶爾

丹策凌塔勒瑪善領歸化城兵千備北路軍調遣
十年二月將軍達爾濟駐伯格爾

上以塔勒瑪善歷練

命叅贊軍務尋署前鋒統領會準噶爾賊為北路軍所
敗竄額得爾河源塔勒瑪善以兵追之十三年駐
防烏里雅蘇臺乾隆十一年定邊副將軍策凌入

覲

命塔勒瑪善署理十三年

召回京二十年正月大兵進勦準噶爾派赴額爾齊斯
屯田九月阿睦爾撒納由烏隆古叛遁塔勒瑪善
偕定邊左副將軍成袞扎布以兵偵之十一月至
烏隆古之扎克鄂博擒斬賊党肯哲顏達什巴雅
爾圖薩喀及其孥二十一年授北路參贊大臣尋
以年老回京任護軍統領二十五年卒長子伊柱
乾隆九年任佐領二十年授二等侍衛二十一年
九月授索倫總管偕副都統濟福侍衛德爾森保

赴喀爾喀車臣汗部緝劫賊十一月俄羅斯奈瑪爾等越境肆竊伊柱以呼倫貝爾兵五百駐卡倫候調遣二十二年齊木齊格特賊什第等逃至呼倫貝爾游牧之西默爾根哈瑪爾伊柱等盡擒之下部議敘二十四年正月偕副都統富景解馬赴阿克蘇四月隨將軍兆忠軍營行走七月逆首霍集占棄葉爾羌走副將軍富德等追至阿勒楚爾賊設伏兩山間我兵分三隊奮擊伊柱領右翼自

辰至午賊大潰翌日至巴達克山界伊西洱庫爾
淖爾賊據險守大兵分路攻剽樹四纛降賊萬餘
伊柱偕巴圖濟爾噶勒等堵截山後策應有功九
月富德派侍衛賽音圖等往巴達克山勒獻霍集
占伊柱駐兵卡倫張聲勢瓦罕伯克以戶口降十
一月巴達克山汗素勒坦沙函獻霍集占首回部
平伊柱領兵千駐喀什噶爾十二月領駐防兵護
回人於伊犁屯田二十五年正月

命協捕嗎哈沁二月大軍凱旋

上御豐澤園幄次

宴賚將軍兆惠等及從征將士

賜伊柱緞十二銀五百兩四月伊柱奏言臣分領屯田

回人至海努克其地舊有廟宇營壘周圍俱可耕

種即將官兵駐劄距回人二三里易為防護伊犁

河南安臺瞭望共五處立村莊十五修葺溝渠引

水灌田所携粟麥本月播種全完回人所分各

莊均有墻垣基址暫搭窩鋪俟農隙伐木作屋

諭曰看來伊犁屯田俱有舊蹟將來漸次開拓更於
軍食有裨著傳諭伊柱於一切應辦事宜先時相度
加意奮勉十二月以屯田豐收議敘加一級二十六
年哈薩克屬人越境游牧伊柱以兵驅令遷移二
十七年追叙平定準噶爾及回部功給騎都尉世
職二十八年授鑲藍旗蒙古副都統三十二年隨
將軍明瑞征緬甸擊賊老官屯三十三年病卒

敕照陣亡例議卹

賜祭葬又給一騎都尉併為三等輕車都尉子額爾登
布襲官黑龍江副都統

鄂彌達

鄂彌達滿洲正白旗人姓鄂濟雍正元年由戶部
筆帖式授吏部主事累遷郎中五年

命同廣東巡撫楊文乾等往福建清查倉庫六年授貴州
布政使以妄請清丈軍田並令地方官管社倉定考成

訓飭之八年擢廣東巡撫九年三月疏言烏鎗向有嚴禁
但廣東瓊州孤懸海外民藉烏鎗為防禦未便照
內地收繳請令戶各藏一多者治罪下部議行六
月請移廣州府通判駐新城南海縣縣丞駐十三
行從之九月又奏移設官弁事宜一新會開平兩
縣界之大官田清遠英德兩縣界之大埔坪均衝
要請各設捕盜同知大官田同知就近歸肇羅道
大埔坪同知歸廣南韶連道轄又大埔坪請撥駐

右翼鎮標千總一兵三十令該同知轄一陽江縣
之海陵島電白縣之沙渚墟距本縣遠請各增巡
檢一廣州府理徭同知向兼連州連山陽山三州
縣捕務後改理徭軍民同知專理徭事捕務停管
年來徭馴事簡請將三州縣捕務仍歸理徭同知
查察一移廉州府同知駐欽州瓊州府同知駐崖
州高州府通判駐府屬之梅萊羅定州羅苛司巡
檢駐州屬東安縣之西山其原管地歸東安典史

轄一崖州水土惡正雜各官俱列邊俸其移駐之
海防撫黎同知三年內果撫綏有術黎民安堵請
照例以應陞之缺即用一潮州肇慶二府通判請
兼捕盜銜分地督緝潮州府同知現駐饒平縣之
黃岡專理海防請將附近之饒平惠來海陽潮陽
澄海普寧六縣捕務責令兼管其附近郡城之揭
陽大埔程鄉鎮平平遠五縣捕務分與通判督緝
肇慶府屬之高要高明新興陽春陽江五縣捕務歸

肇慶府同知兼管德慶封川開建四會四州縣捕
務歸通判兼管均如所請行十一月訪得廣西梧
州奸民陳美倫曾合等糾黨散剗謀不軌盡捕擒
之得

旨嘉獎十年二月請改廣東撫標中軍遊擊為叅將從之
尋

命署廣東總督四月疏言總督向駐肇慶所以控制兩粵
今廣西已歸雲貴總督轄而廣東一省廣州為適

中之地請移駐廣州

詔如所請閏五月訪獲饒平縣糾衆謀逆之已革武舉余
猊等六月疏言廣東山海交錯俗悍民貧查肇慶
府新設竊山縣及附近之恩平開平等縣有荒田
數萬畝臣現飭屬招墾俾無業貧民得此資生不
流為匪

諭獎其料理妥協八月請移合浦縣縣丞駐永安地方從
之是月實授廣東總督九月奏臣前在巡撫任內

有安南番民鄧文武等五十六人遭風飄入廣東
銅鼓角海面臣給印文及路費送歸今伊國王寄
到伽南沉香生絹棕竹胡椒燕窩魚翅海參諸物
為謝臣却還不受

諭曰辭讓不受甚是仍須婉言覆之庶為得體十二月疏
言廣州府省會有潭州及黃梁都諸海口寥濶無
藩籬請於潭州苦草汛築土城移守備一兵百二
十駐之黃梁都亦築土城移都司一兵百二十駐

之凡附近省城險要各增墩臺分布弁兵又言廣
州商賈雲集本地產穀不敷民食向皆仰給廣西
販運遇穀賤則西販觀望不前而東省價輒驟昂
惟有買備平糶之法查距廣州百二十里之三水
縣屬有西南鎮為西販聚所請就彼建倉於西穀
擁積時買貯數十萬石穀貴則開倉平糶所需銀
於江西撥備項內動五萬兩分年扣還廣州糧捕
通判事簡令專司其事管倉之員即以三水縣西

南驛驛丞兼充

詔均如所請十一年三月請改程鄉縣為直隸州轄興寧
長樂平遠鎮平四縣教諭改學正典史改吏目部
議從之定新改直隸州曰嘉應五月疏言米貴由
囤戶居竒一日間其價頻增一店長價諸店皆然
名曰齊行深為民病臣倣京師設米局之法於廣
東省城設米局三動廣州府及番禺南海二縣倉
穀平糶倉斗每石定價一兩以倉大使縣丞典史

領之所得價携赴穀賤處採買源源轉運

諭曰平糶不過暫濟一時設局即堪行之永久此奏殊屬可嘉七月疏言各標協營及舖戶行匠所用硝磺向由布政使給票買運據布政使甘汝來詳改由總督衙門給票稽查較嚴密請如所議辦理

詔永為例八月請令韶州府糧捕通判兼理曲江樂昌乳源三縣徭務改給關防並立徭甲徭目查察從之十二年三月請增設龍川縣巡檢及平遠縣壩頭

司西寧縣懷鄉司夜護司巡檢各一裁都城司巡檢從之七月以保舉革職知縣王者輔考語失當

訓飭之八月兼管粵海關稅務十二月疏言欽州屬之東

興街思勒崗地近安南民夷雜處且多私販請於龍門協酌撥千把總一兵五十防守新興街移本

州州判駐之再於該協抽撥隊目一兵十七防守思勒崗令廣州府同知就近彈壓均如所請行十

三年四月

命兼轄廣西仍駐肇慶府閏四月疏言新寧縣屬之廣海
寨濱海距縣遠請移本縣望高司巡檢往駐再上
川之大萌灣下川之大坦二處與縣寨俱隔大洋
請增設陸路二汛從之五月貴州台拱逆苗不法
鄂彌達奏派廣東督提標兵二千令左江總兵王
無黨率赴古州援勦又調廣西撫標兵五百駐黔
粵界軍機大臣奏其調度妥協

諭獎之乾隆元年五月疏劾廣東按察使白映棠於奉

旨免緝私鹽一事並未遵奉原文分別老幼男婦擅發
小票混稱貧難百姓挑負四十觔以下者不許緝
捕致強壯奸徒無不藉口貧民公然成羣販私白
映崇以刑名官攬越鹽政率意妄行咎實難逭

諭曰朕因各省鹽務向來辦理未妥不肖官吏往往縱
放大梟拘拏小販以致濱海近場之窮民藉肩販以
度日餬口者胥受擾害是以諭令寬其禁約毋許苛
求原以惠養貧民並非縱容匪類聽其作奸犯科也

豈知無賴之徒妄稱奉旨肆行無忌若不速加嚴懲則各處聞風效尤將大為地方之害近日李衛之嚴密查拏鄂彌達之據實叅奏此二人辦理乃深知朕心而洞悉政體者若天下督撫皆似此居心不存觀望之念秉公執法則兇暴咸知斂跡必無長奸貽患之慮矣鄂彌達著交部議叙白映棠職司刑憲不能禁約私梟反出示給票縱民為匪甚屬溺職著解任來京候旨十月疏言廣東益向由各場配運至省河

及潮州廣濟橋轉兌各埠例俟各埠商將引餉鹽價全完方准運埠發賣但商貨微薄完餉後每無餘力並完鹽價勢必不能乘時全拆秋冬水淺運艱無益接濟於民食未便請每年春夏運到鹽包如該埠額引三封者准其先拆一封多寡照此遞算運貯各埠倉備秋冬銷賣照例先完餉銀其鹽價限開倉後兩月完繳商民兩便下部議行時御史薛韞條奏廣西團練鄉勇並設孺童義學疏下

鄂爾達議二年三月奏言鄉勇原可以助官兵之不逮但今昔異勢未便輕議無論鄉農應募其坐作止齊非練總甲長所能操演即有司中曉暢戎務者亦難其人而終歲簿書鞅掌又何暇循行村落為之訓練且良懦者必不肯應名願充者必多屬强悍若輩籍有在官名籍保無滋釁生事若復議贍給費且不貲與增官兵異臣愚以為不若訓練土司兵於邊疆有益至徭童義學廣東韶連等

屬前已設立著有成效應如薛馥所奏得

旨如議尋疏言惠潮二府嘉應州屬之民挈眷入川過多恐其中或有被川民煽誘者臣委員赴川粵界查票驗放如無票及人票不符即按名給與口糧路費令回籍仍飭各州縣不得濫給照票又言廣州府屬之靖康歸德二鹽場毗連請裁靖康場大使併入歸德場改為歸靖場香山場向無專員請增設大使高州府屬之博茂場亦增設大使改為

電茂場均從之五月疏言貴州新闢苗疆督臣張廣泗奏設屯軍墾逆苗絕田臣以現今苗稀畏威安帖將來生齒漸繁地少人多必致怨生又恐屯軍虐苗激變請將屯軍撤於附近防守其田仍給苗民

諭曰所奏識見甚正即朕意亦然但張廣泗持之甚力兼以首尾承辦此事不得不照彼所請然朕則以為終非長策也十二月疏言准部咨廣東開採銅礦查惠潮韶肇等府

州礦山甚多若一時俱開不但需員料理即殷實之商亦難驟得請先開惠州府屬之歸善陽春韶州府屬之英德曲江四處歲可得銅三四百萬勛於京局鼓鑄有益迨積有餘銅廣東亦可開局鼓鑄銅價自平報

聞四年二月調川陝總督四月疏言陝西榆林府沿邊貧民歲往鄂爾多斯種地論牛納租其牛具籽種日用口食悉貸之鄂爾多斯秋收餘糧又向鄂爾多斯易牛羊皮携至內地變價然後重息還債層

層剝削可憫為貧民計不若春間領票出口時酌
所種多寡官借以銀不取其息秋收時即將所收
糧照時價交抵歲以為常不但貧民免借貸折耗
之苦而倉儲亦可漸充

諭曰如此辦理亦籌備積貯之一道六月又言陝省麥多
穀少從前民借俱令還穀致積欠至百餘萬石上
年奉

旨准以一麥抵還二穀閭閻踴躍完納倉貯不致虛懸

請嗣後遇災賑動倉穀時儘小麥支放每石抵穀二

石

諭曰此議甚為妥協七月又言臣前因陝甘倉儲未充
請禁隣省商販並撥司庫銀採買奉

旨令臣與山西撫臣石麟妥議今議如晉省豐收陝省
即禁販出境若晉省告糴即通販放行俾彼此緩
急得濟再令歲陝西並甘肅蘭鞏平慶等處夏季
豐收乞

允臣前奏於司庫內撥銀十萬兩酌量採買並於陝西附近晉省及甘肅附近寧夏之地多貯一有急需撥運便捷

諭曰所議甚是如所議行十一月奏修寧夏府渠道資灌溉並加修沿河長堤一道

上報可又奏安西鎮遠在口外鎮標三營額設馬步兵三千除駐防哈密暨安塘遊巡差遣並承種屯田存城兵僅數百年來商民日增請照涼州柳林湖

屯田之例募流寓民人及營兵子弟承種屯田將原派種之兵撤回存城差操以實營伍其屯田每年所收民得六分官得四分按數輸備兵糧籽種牛具官為借給秋收扣還交靖逆通判管理安西道督查部議從之五年三月

命來京候旨先是鄂彌達任兩廣總督時革職知府袁安煜逗遛廣州放債盤剝並串同鄂彌達家人蕭二霸佔煤山至是為接任總督馬爾泰所劾刑部

鞠寔以

聞

諭曰鄂彌達身為封疆大臣一任家人交結屬員霸佔
民利婪賊盈萬招搖不法實屬溺職鄂彌達著革職
袁安煜借帑營私恣肆妄行似此貪劣之員鄂彌達
曾在朕前獎以好語以致袁安煜肆無忌憚更屬徇
庇袁安煜應賠贖銀著鄂彌達照數另賠一倍以示罰
懲十月授兵部侍郎六年授寧古塔將軍尋調荊州

將軍九年二月署湖廣總督十月疏言武漢各屬城郭民田逼臨水次全賴隄塍保護武昌城西南保安門之外蕎麥灣向有老隄臨江為金沙洲之隄防即武昌之保障江流衝激日漸坍却應再退入灣裏築大隄一道又安陸府屬之沙洋大隄為漢口險工現議修築但漢水日趨南應增建月隄請借帑五萬兩交商營運生息備工用再襄陽府之老龍石隄舊有子隄漸坍歲修銀僅三百餘兩請

將庫貯軍需項下撥五千兩交商生息備用部議
從之十二月疏言湖北有待撥直隸米二十萬石
令歲直隸湖北俱獲豐收而浙江間有被水應賑
處請酌撥十萬石運浙備糶所得價歸楚買補

上嘉允之十年實授湖廣總督十一年以疏叅驛鹽道
曹繩柱

諭曰鄂彌達行止不檢久經廢棄朕復加擢用冀其痛
改前非力圖報稱乃伊自任湖廣總督以來舊習未

除於一切地方事務並不實心經理即今曹繩柱貪劣各款亦係奉朕諭後始行查叅可見於察吏安民處並不留心且年已就衰不稱封疆之寄著來京候旨十五年授吏部侍郎兼副都統十六年授鑲藍旗漢軍都統仍兼侍郎事十九年二月以察議侍郎張泰開徇私保舉事不寔議革職得

旨從寬留任十月署吏部尚書二十年五月兼管工部尚書六月授刑部尚書仍署吏部尚書兼議政大

臣九月署直隸總督

上巡幸畿甸

賜詩曰幾輔歲巡省清塵勤且諳長民寧祇此適已率
為慙歲美人教儉男耕女拙蠶實心日戒五異政蹟
宗三切以慈祥導徐將禮樂涵休風自首善遐壤庶
因覃二十一年四月兼吏部尚書十二月協辦大學
士二十二年

命紫禁城內騎馬加太子太保二十三年八月協辦步

軍統領衙門刑名事務十月充


經筵講官二十六年五月以病

賜人復並

遣醫診視七月卒遺疏入

諭曰鄂彌達敬歷中外宣力有年今聞溘逝朕心深為軫惜著加恩賞銀二千兩辦理喪事仍派散秩大臣一員帶領侍衛十員往奠茶酒應得卹典該部察例具奏尋

賜祭葬如例謚文恭



欽定八旗通志卷一百六十一